

Gui'ch guxhaal San Pabl loj ree bén Colosas rliladx Jesucrist

Rhxiaal Pab xtiidx Dios

¹ Naj Pab, nahn tijb xi apóstol Jesucrist, din zian rēn Dios. Naj con Timoteo nayajcan compniar raliduladxan Jesucrist, ² caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tääman luxdoodi.

Rbejdx Pab Dios por ree xbejn Jesucrist

³ Beegaj chi rarejdxan Dios, xDad Dad Jesucrist, radëédan quixtëe lojman por lëjt. ⁴ Din ma baguejnan xhienaaag rliladxidi Jesucrist xhie täänaag rëndi gra ree bén naj ree xbejnman. ⁵ Guial cabëzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. ⁶ Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rënman lëjt. ⁷ Lëjt gogbee diidxli guin ree chi balüü Epafras laa reen lëjt. Laaman cayüjn dunujn yudar abi' däd rayënan laaman, din laaman diidxli cayüjn sirv loj Jesucrist delant lojdi. ⁸ Abi' täälaaman be diidx du lojn xhienaaag rën lasa'di guial yu' xSprijt Dios luxdoodi. ⁹ Zeel diizd chi baguejnan xhienaaag nabandi, ad racwëëzt rarejdxan Dios

por läjt din chignia'di zagdxe xhienaaag rënman güündi gunee tēéman läjt gra loj guialrajc guixhial tēéman xquiarguejndi por xSprijtaman. ¹⁰ Abi' zian guibandi zi'c rayal guiban ree bén rliladx Jesucrist, din güündi zi'c tal ruladxaman abi' gusnuu güündi ganax ree ni zagdxe gusnuu tēé güünbeedi Dios mazri. ¹¹ Abi' ranaaban lojman din con xguialrniabee za'cdxoonman gagnëman läjt din sudxi'chidi, taan tēédi xhietëéz loj guialzi tēdidi sin guial yalenya'di. ¹² Abi' xt nix chu' luxdoodi gudëëdi quixtëéz loj dux Dad ree Dios guial basiaman läjt din yayalidi ni rayal ree xbejnman, bén zinal ree xnejzaman. ¹³ Laaman babëë dunuj ree loj xguialrniabee xindxab abi' bagu'man dunuj ree loj xguialrniabee xi'nman Jesucrist bén rënman, ¹⁴ abi' gudijxaman por dux tol ree, yan ma raya'p ree perdon loj Dios.

Por xguialgüt Jesucrist ma nadxu'në' ree Dios zagdxe

¹⁵ Achut zajc guguaa Dios, per Jesucrist naj zi'c gajczi naj Dios. Abi' laaman mal rniabeenëman Dios diizd chi gad guidxliuj gacchaaw. ¹⁶ Por Jesucrist gojc gra ni yu' xanyabaa në loj guidxliuj, zi'c ni ruguaa bejn zi'c ni ad ruguaataman. Abi' por laaman yu' graloj guialrniabee në graloj guialguxtis ni rajp ree ni ad rajct ruguaa ree bejn. Gran gojc por laaman në par laaman. ¹⁷ Mal yu' Jesucrist diizd guia'xchej chi gad guidxliuj gacchaaw, laaman dxibguijc gra abi' rniabeeman gra. ¹⁸ Abi' laa tēéman rniabee gra ree bén rliladx laaman, bén ma naj ree xbejnman. Laaman naj bén yaloj abi' yaloj laaman baban loj ree bengüt

din guiguien guial tijbz laaman rajp guialniabee loj gra. ¹⁹ Din bayuladx Dios gac Jesucrist zi'c gajczi naj Dios. ²⁰ Abi' por Jesucrist gra bénguidxliuj ma za' zagdxe con Dios, zi'c ni yu' loj guidxliuj zi'c ni yu' xanyabaa. Za' bejn zagdxe con Dios por xguialgüjt Jesucrist loj crüjz. ²¹ Gocli ad gojctidi tijbz con Dios, gojquidi zi'c bén bidxe'ch laaman guial beendi ganax ni mal. ²² Per yan ma za'di zagdxe con Dios por ree guialzi ni gudëd Jesucrist chi gütaman loj crüjz din gac guidxindi lojman naya sin dol chitëe xhie naman lojdi. ²³ Per par zian rayal sudxi'chidi loj guialliladx ni rajpidi, ad gucwëëz chinalidi xtiidxza'c Jesucrist ni ma biguiejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree bén catie'ch diidxza'c guin ree.

*Bacaabee Dios Pab din güünman sirv loj ree xbejn
Dios*

²⁴ Abi' yan nix yu' luxdon por guialzi ni cadëedan guial rünan läjt yudar abi' lasa'gajc guialzi ni gudëd Jesucrist cadëedan din chile' günan yudar bén rliladx ree laaman bén ma naj ree xbejnman. ²⁵ Din Dios bacaabee naj par günan sirv loj ree xbejnman. Abi' laaman banee dxiin guin naj din gulün läjt xtiidxaman zi'c tal najn. ²⁶ Diizd tiamp gulal ad bignia't ree bejn zagdxe ni rën guiëb xtiidx Dios. Per yan ma balüüman ni rën guiëban loj ree xbejnman. ²⁷ Din gugojn reeman bén ad najt ree bén Israel xhienaaq naj xguial-naza'c za'cdxoonman. Abi' ni ad balüüt Dios loj ree bejn tiamp gulal naj guial nabannë Jesucrist läjt abi' por laaman ragbeedi zagdxe guial yu'

dxej yayalidi xanyabaa. ²⁸ Abi' dunujn batie'ch xtiidx Jesucrist, baneenë'n bejn ree, balüü tëen laa reeman con gra quiargueijn ni runee Dios din chi guidxin reeman lojman por Jesucrist ma naj reeman zi'c rënman gac reeman. ²⁹ Abi' naj dád cayünan naguiejn cayünan dxiin guie con guialrníabee ni baneeman naj.

2

¹ Rënan gagbeedi guial cayün da'tan naguiejn cayünan léjt yudar, në ree bén zojb guiedx Laodicea në gra ree bén ad wayünbeet naj. ² Cayünan naguiejn din yayu luxdoo reeman din gusnuu guiban reeman tibzzi, guiën lasa' reeman chu' tëe xquiargueijn reeman din chile' güünbee reeman ni ad balüüt Dios bejn ree gulal abi' laaman naj Jesucrist, ³ por laaman zëed gra guialrajc në guialrignia'. ⁴ Canin diidx guie ree lojdi chitëe chu gusquiee léjt con ree xtiidx zagdxe reeman. ⁵ Majsi ad za'tan con léjt, per yu'guican léjt abi' rabaan guial cayüjndi zi'c rayal, za'dxi'ch tëedi loj guialrliladxidi Jesucrist.

⁶ Zeel zi'c ma rliladxidi Dad Jesucrist, ziangajc gol gojc tibzzi con laaman. ⁷ Gol been naguiejn gol binalaman guidiblagaa, gol guzudxi'ch loj guial rliladxidi laaman zi'c ma basiididi ad gucwëëz tëe gudëëdi quixtëe loj Dios.

Guialnaban ni rüdëëd Jesucrist

⁸ Gol gojp ciudad, ad tiëbidi güün ree bén rën gusquiee léjt gan con ree ni rulüü reeman o con ree diidx ni ad rüjnt sirv ni zëed por ree costumbr o

Gui'ch par ree bén Colosas 2:9

v

Gui'ch par ree bén Colosas 2:18

por ree guialrniabee yu' loj guidxliuj, din ad zëëdt
reen por Jesucrist.

⁹ Din zi'cgajczi naj Dios, ziangajczi naj Jesucrist.
¹⁰ Abi' nabannëdi Dios guidiblagaa guial najdi
tijbzi con Jesucrist, din laaman rniabee loj gra
guialrniabee në loj guialguxtis. ¹¹ Abi' tëë guial
ma najdi tijbzi con Jesucrist ma yu'di xsenman,
per ad lasa't sen ru ree bén Israel, sen yu'di por
laaman najn guial ma basa'ndi dol tiblad. ¹² Chi
gurobnijsidi, laan rën guiëb guial güjtidi con Jesu-
crist abi' babandi con laaman stjb guial rliladxidi
Dios rajp guialrniabee persi basbanman Jesucrist
loj guialgüjt. ¹³ Gocli gojquidi zi'c bengüt delant
loj Dios por xtoldi në por guial ad guyutidi sen
ni ru ree bén Israel. Per yan por Jesucrist, ma
been Dios dux tol ree perdon abi' ma raya'p ree
guialnaban con Jesucrist. ¹⁴ Ma badxi'ca Dios dux
tol ree ni bayal nadix ree zi'c rniabee xleyaman,
badxi'caman dol guin ree chi güt Jesucrist loj
crüjz abi' laaman naj bén gudix laan por dunuj
ree. ¹⁵ Abi' zian beenman gan gra loj ree guial-
guxtis në loj gra guialrniabee zëëd loj xindxab.
Basa'nxtuman laa reeman loj ree bejn, beenman
laa reeman gan guial güjtaman loj crüjz.

Gol been x gab ni yu' ree xanyabaa

¹⁶ Zeel achut rayal gula'ch lëjt por ni rawidi në ni
rë'di o por guial ad rüjntidi cwent dxej lanij o dxej
ni yu' bëëw cüb o dxej razailadx ree bejn. ¹⁷ Din gra
ree ni guin naj zi'c tijb xbala Jesucrist abi' yan laa-
man naj bén ma bi't. ¹⁸ Ad tiëbidi gutiaalguiiw bén
rën ree anjl zi'c Dios lëjt, par gusa'ndi xnejz Dios,
din laa reeman rulüü naj reeman bén naxanladx,

per ad najt reeman laan rëb tëë reeman guial yu' ni rulüüloj loj reeman. Dxel laagajc reeman rlies xvalor por xixgab gajc reeman. ¹⁹ Per laa reeman ad nabannët reeman Jesucrist, bén rniabee dunuj ree. Abi' por laaman caysnuu cayignia' ree xhien-aag yunaal ree xnejzaman din yadxajg du lasa' ree yayajc ree tibzi con Jesucrist zi'c naj xixgab Dios.

²⁰ Yan bal walidi ma güjtidi con Jesucrist par ree ni rbëëguijc ree bënguidxliuj, ¿chexquiza zeel ruzoobidi xtiidx ree bén rëb: ²¹ "Ad rayalt gugaalil ni guin, ad gawil ni guin, ad guiniaazil ni guin"? ²² Gra ree mandamient guin yu' dxej nit reen, din bënguidxliuj gulëëguijc laa reen. ²³ Diidxliczi rulüü lasajc da't ree mandamient guin guial tant rüjn ree bejn naguiejn güün reeman laa reen cumplid abi' rüjn reeman bén naxanladx dxel rusagzi laagajc reeman, per achetczi lasajc ree mandamient guin par gucwëëz reen ni mal rzëébladx reeman güün reeman.

3

¹ Zeel bal ma rajpidi guialnaban cüb con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. ² Ad güündi xgab ganax ree ni yu' loj guidxliuj, gol been xgab mazri ni yu' ree xanyabaa. ³ Gol gunaladx ma güjtidi par ree ni yu' loj guidxliuj abi' ma rajpidi guialnaban delant loj Dios por Jesucrist. ⁴ Abi' chi gui't Jesucrist stijb, bén runee dunuj ree guialnaban, né lëjt yayal guibannë laaman loj xguialrniabee za'cdxoornman.

Zi'c rayal guiban ree bén rliladx Jesucrist

⁵ Yan, gol basa'n gra ree ni mal riga' loj guidxliuj guie. Ad sunëdi bén ren bén ad najt lacheelidi. Gol basa'n ni ad rüjnt ree sirv, në ree xgabmal në ree ni mal yu'di gan güundi. Ad sëébladx téeedi gapidi gra loj ni yu' loj guidxliuj din bén rüjn zian laan rënman mazri luar Dios. ⁶ Abi' por ree ni guin zëed xcasti Dios par ree bén ad ruzoobt xtiidxaman. ⁷ Lasa' ree ni mal guin beendi chi gadidi güünbee Jesucrist. ⁸ Per yan gol basa'n gra ree ni mal guin zi'c guialrdxe'ch, guialralen lasa', guialrüjn ni mal lasa', guialrnieeguijdx në guial rniece diidxguijdx. ⁹ Ad rusquiee loj lasa'di, din ad nabantridi zi'c gubandi gocli chi beendi ni mal ree, ¹⁰ din yan ma bidxaa mod nabandi. Ma najdi zi'c bencüb guial chigagaj ma cayajquidi zi'c rën Dios gaquidi din güünbeedi Dios mazri zagdxe, bén runee lëjt guialnaban. ¹¹ Abi' chi ma rliladx bejn Jesucrist, achet güünan chutëëz najman, bal najman bén grieg o bén Israel, bal yu'man sen ru ree bén Israel o ad yu'taman laan ya, bal najman benxit o najman bén zojb dajn, bal najman zi'c bén nado' o ad najtaman zi'c bén nado' Per ni mazri lasajc naj guialrliladxaman Jesucrist, bén rniabee za' téeeman con dugra ree.

¹² Abi' Dios rën lëjt, zeel gulejman lëjt din gaquidi xbejnman. Zeel gol baya bejn ree, gol gojc benza'c, gol gojc bén naxanladx, ad gaquidi bendxal, gol gojp pasens lasa'di. ¹³ Ad yalenya'në lasa'di. Gol been tée perdon lasa'di bal xhie rüjnnë reeman lëjt. Zi'c been Dad Jesucrist lëjt perdon ziangajc gol been perdon bejn ree. ¹⁴ Gol badxe'guijc guialrën lasa' naj ni mazri lasajc. Abi'

guialrën lasa' guin rüjn yudar din guidxaag guiban bejn. ¹⁵ Gol cwëjb nabee Jesucrist läjt din yabedxe luxdoodi, din par zian gulej Dios läjt par gaquidi tibzzi por Jesucrist gol badëë tëë quixtëë lojman por zian.

¹⁶ Gol badxe'guijc da't xtiidx Jesucrist, gol balüü gol guneenë tëë lasa'di zi'c rayal. Gol badëë quixtëë loj Dios con ree cant në ree salmos në los demazri ree cant ni naj par Dios. ¹⁷ Xhietëëz ni güündi ni guiniee tëëdi, yaloj xgaj gol basaaladx Dad Jesús abi' por laaman gol badëëd quixtëë loj dux Dad ree Dios.

Zi'c rayal guiban tijb famil

¹⁸ Lëjt bengunaa yu' ree lacheel, gol bazoob xtiidx lacheelidi, din zian rayal güün bén rliladx Jesucrist. ¹⁹ Abi' ziangajc läjt xinguaaw yu' ree lacheel, gol guyën lacheelidi ad gusagzi tëëdi laa reeman.

²⁰ Në läjt xin naj ree xi'n, gol bazoob gra xtiidx ree xDadiddi, din zian ruladx Dios. ²¹ Abi' ziangajc läjt dad na, ad gusagdiaj xi'ndi chitëë guidxe'ch reex abi' yalenyä' reex.

²² Lëjt bén rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatzi reeman läjt par yaya'ndi zagdxe loj reeman, guidib luxdoodi gol been xchiin reeman por respejt ni rajpidi Dad Jesucrist. ²³ Xhietëëz nin güündi, gol beenan con gan. Gol gunaladx loj Jesucrist cayüjndi sirv, ad lojt benguidxliuj. ²⁴ Din läjt ma ragbee guial zian yu' ni tia'di loj Dad Jesucrist guial cayüjndi laaman sirv. ²⁵ Per par ree bén rüjn

ni mal, laa reeman yayal casti por ni mal been
reeman, din Dios ad rbetaman loj bejn.

4

¹ Nëgajc lëjt bén naj ree patron, gol been zi'c rayal
con ree bén rüjn xchiindi, gol gojc tëë benza'c con
laa reeman, din lëjt ragbee guial xanyabaa yu' bén
rniabee lëjt.

² Gol guzusin, gol gurejdx Dios ad bal guchee-
ladxidi, gol badëë quixtëë lojman. ³ Gol gurejdx
tëë Dios por dunujn din guixhialaman nejz din gac
yatie'chan mazri xtiidx Jesucrist ni ad wayünbeet
ree bejn. Abi' por ree diidx guin yu'n ladxguiib.
⁴ Gol gurejdx Dios din gac gatiechan diidx guin ree
loj ree bejn zi'c rayal din gac chignia' reeman laan
zagdxe.

⁵ Gol gubajn zagdxe delant loj ree bén ad
waliladxt Jesucrist gol gunee tëë xtiidxaman loj
reeman beegaj chi chu' mod. ⁶ Chi rüdi diidx, gol
be diidx xnejz din yayuladx bejn ni rnieedi gag-
bee tëëdi xhienaaag yadxi'di ni rniabdiidx reeman
lojdi.

Rxhiaal ree xbejn Jesucrist xtiidx Dios

⁷ Tíquico, tijb du lasa' ree, bén rayën ree, bén
diidxli cayüjn naj yudar cayünan sirv loj Jesucrist,
laaman gugojn lëjt gra xhienaaag za'n niz guie.

⁸ Par zian caxhalan laaman din gugojnman lëjt
xhienaaag nadxu'n niz guie din yagu' tëëman lux-
doodi. ⁹ Abi' con laagajcaman caxhalan Onésimo,
tijb du lasa' ree bén rayën gajc ree, bén nabán zi'c
rayal, bén naj bén ladxidi. Laa reeman gugojn lëjt
gra ni cayajc niz guie.

¹⁰ Aristarco, bén yu'në'n ladxguiib, laaman rxhiaal xtiidx Dios lojdi. Nëgajc Marcw, bijchwin Bernabé rugajpdioz lëjt. Abi' ma bagojnan lëjt chunin naj Marcw, bal gui'taman guidganajman lëjt, gol baca'man zagdxe. ¹¹ Abi' négajc Jesús, bén la gajc Justo, rxhiaal xtiidx Dios lojdi. Loj gra ree bén Israel rliladx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bén cagu' luxdon. ¹² Në Epafras, bén ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczi rbejdxaman Dios por lëjt din sudxi'chidi chinalidi xnejz Dios güün téeedi gra zi'c rënman. ¹³ Naj ragbee zagdxe guial dák ruman xgab por lëjt, né por ree bén Laodicea, né por ree bén Hierápolis. ¹⁴ Lujc, doctor rayën da't ree, né Demas, né reeman rxhiaal xtiidx Dios lojdi.

¹⁵ Gol bagajpdioz ree dux compniar ree bén rliladx ree Jesucrist, bén zojb ree luguiedx Laodicea. Gol bagajpdioz tée Ninfas con los demazri ree xbejn Jesucrist bén rado'p ree lidxaman. ¹⁶ Chi ma gulox biilidi gui'ch guie, dxel gol guxhaalan loj ree bén rliladx Jesucrist, bén zojb ree luguiedx Laodicea, din né reeman gool laan. Në gui'ch ni guxhalan loj reeman rayal yaxhaal reeman lojdi din négajc lëjt gool laan. ¹⁷ Abi' gol güjdx loj Arquipo din güünman cumplid ni ma bacaabee Dad Jesucrist güünman. ¹⁸ Naj Pab, quijb naj cuca lejtr guie ree par gugajpdiozan lëjt. Gol basaaladx guial yu'n ladxguiib. Dios güünle' lejt. Amén.

Xtiidx Dios

New Testament in Zapotec, Santo Domingo Albarradas (MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
fb4ebcb8-e1f4-5bfc-b08c-f590e137d86d